

Kontuola

ANTZUOLA / Egubakoitza / 2005eko irailaren 16a / 256. zenbakia

KOORDINATZAILEA: Aintzane Irizar • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: kontuola@goiena.com • Lege gordailua: SS1179/02

Autorik Gabeko Eguna egingo dute herrian, datorren eguenean

AINZANE IRIZAR

Automobilak etxean laga eta oinez edo autobusean ibiltzeko eguna izango dugu datorren asteke eguna, irailaren 22a. Autorik Gabeko Eguna antolatu du Udalak egun horretarako. Astelehenean egun horren aurkezpena egin zien alkateak herriko taldeei.

Debagoienean, hiru herrik antolatu dute Autorik Gabeko Eguna, tartean, geureak. Beste bi herriak dira Oñati eta Elgeta.

Egun horren helburuak honakoak dira: kutsadura murriztea, gastuak murriztea, herriko kaleak eta errepideak arintzea eta zerbitzu publikoaren erabilera bultzatzea.

Agenda 21 Udaltaldeko batzarretan behin baino gehiagotan aipatutako gaia da trafikoa eta automobilaren gehiegizko erabilera. Alde batetik, batzar horiekin lotuta dator egun hori. Bestetik, aipatzekoa da datorren urteari begira, Debagoieneko mugikortasunaren arazoari irtenbidea eman nahi diola Mankomunitateak eta zerbitzu publikoaren erabilera bultzatu nahi dutela.



ARTXIBOA

Kalebarrenetik gora, itxi egingo dituzte kaleak eta atzetik bakarrik ibili ahal izango dugu automobilarekin.

LANTEGIETARA, AUTOBUSEAN

Irailaren 22a laneguna denez, jarri dituzten autobus zerbitzuak, batez ere, herriko lantegietan diharduten bergarrei begira jarri dituzte. Autobusa doan izango da egun osoan zehar. Berga-

ratik Antzuolara, 05:30 inguruan irtengo da eguneko lehenengo autobusa eta 21:30ean azkena. Antzuolatik Bergara aldera, berriz, 07:10ean lehenengo eta hurrengo eguneko 06:10ean azkena, gauetz lan egin dutenak etxe-

ratzeko. Herrikoek bertakoek ere automobila ez erabiltzeko eskatzen dute Udaleko arduradunek. Kalebarrenetik gora, gainera, itxita egongo dira kaleak trafikoa-errendako; atzetik bakarrik ibili ahal izango da.

LABUR

Eskulan erakusketa bi asteburuotan

Datozen bi asteburuotan eskulan erakusketa izango dugu, Olaran etxean. Iazko ikasturtean eskulan ikastaroan ibilikoekin lanak jarriko dituzte ikusgai. Irailaren 17an, 18an, 24an eta 25ean egongo da zabalik erakusketa hori; goizez, 12:00etatik 14:00etara, eta arratsaldetan, berriz, 18:30etik 20:00etara.

Donostiara eta Zestoara irteera erretiratuendako

Erretiratuen elkarteak antolatuta, Donostiara eta Zestoara irteera egingo dute, irailaren 29an. Donostian, Elizbarrutiko museoa ikusiko dute; Antzuolako hainbat irudi daude museo horretan. 13:30era arte denbora librea izango dute eta gero Zestoara joango dira; Arozena hotelan bazkalduko dute eta bazkalostean dantzaldia izango dute. Izena emateko aukera izango duzue hilaren 23an eta 24an, 18:00etatik 19:00etara, erretiratuen egoitzan; irteeraren prezioa 25 eurokoa da.

ESKOLA

Herri Ikastetxean 165 ikaslek hasi berri dute ikasturtea

AINZANE IRIZAR

Aurreko astean ekin zioten ikasturte berriari Herri Ikastetxeko neska-mutikoek. Guztira, 165 ikasle izango ditu herriko eskolak; aipatzekoa da, gainera, azkenaldiko ume kopuru handiena hasi dela bi urtekoen gelan: 21, hain justu.

Herri Ikastetxeak 165 ikasle eta 18 irakasle izango ditu hasi berri duten ikasturtean. Bi eta bost urte artekoen geletan, 76 umek jardungo dute; Lehen Hezkuntzan, berriz, lehenengo mailatik bos-

garren mailara bitartean, 89 neska-mutiko izango dituzte.

Irakasleak, berriz, 18 izango dira; horiez gain, jangelako arduraduna eta logopeda bat eta beste irakasle bat ditugu, orduka.

Bi hilabete eta erdi inguruko oporraldia izan dute umeek; ekainaren 23tik, hain zuzen ere. Irakasleek, berriz, ekainaren 30etik irailaren 1era.


HAURRESKOLAN, ZAZPI UME

Irailaren 6an zabaldu ditu berriz ateak Haurreskolak. Ikasturte berri honetan zazpi ume hasi dira hantxe. Sarrera prozesua ume

bakoitzaren arabera denez, ez dira denak batera hasten.

ZAINZA ZERBITZUA

Aurreko ikasturtean zaintza zerbitzua jartzeko saiakera egin zuten Herri Ikastetxean, baina, ez zen nahiko jende batu. Zaintza zerbitzua da eskolak hasi aurretik edo bukatu ondoren, umeak ikastetxean zaintzeko zerbitzua. Iaz bertan behera geratu zen arren, asmoak aurrera jarraitzen du; hortaz, norbaitek interesa izanez gero, Pausoka elkarteko norbaitegana jo dezake edo eskolara deitu (943 76 62 68).



ARTXIBOA

Haurreskolan zazpi umek eman dute izena.

IRAKURLIAREN TXOKUA

ARROLA MENDIZALE ELKARTEAK HERRITAR GUZTIEI

Ez genuen uste eskutitz hau idaztera inoiz iritsiko ginenik, baina, tamalez, beste irtenbiderik ezean, zuengana zuzentzen gara.

Jakingo duzun bezala, Arrolako junta bi urtetik behin berritzen da, baina, juntarako jende faltagatik, hirugarren eta azkeneko urtea egingo dugu aurten.

Garai honetan hurrengo urterako egutegia zehazten da, baina, juntakide berri-rik ezean, ez da programarik egingo eta horrek esan nahiko du Arrolaren 30 urteko ibilbide oparoa bertan behera geratuko dela, zoritxarrez.

Hori gerta ez dadin, behar beharrezkoa da zure aportazioa. Gurasoak, gazteak, esperientziadunak... Guztiok zarete beharrezkoak.

Guztion artean, berandu-uegi izan baino lehen ea Arrola Mendizale Elkarte indarberritzen dugun. Horretarako prest baldin bazaude, jarri harremant-eran Arrolako juntako edozein kidearekin, urriaren 31 baino lehen. Honakook osatzen dugu batzordea: Marije Zubimendik, Uraitz Garciak, Olatz Lezetak, Juanma Lasak, Maria Dolores Arbuluk eta Mari Beni Larreak.

ARROLA MENDIZALE ELKARTEAREN ZUZEN-DARITZA BATZORDEA

IRAKURLIAREN TXOKUA

KONTUOLAn zure gutuna argitaratzea nahi izanez gero, Bergarako egoitzara ekarri edo kontuola@goiena.com helbidera bidali. Betiere, martitzen goiza aurretik bidaltzea komeni da.

ELKARRIZKETA

JOSU TELLABIDE/ETNOLOGOA

“Telleria lantegia 40 urtean itxita egon den arren, materiala ondo zegoen”

A.I.

Telleria uhalgintza lantegian dihardute Josu Tellabidek eta Asier bere lankideak, hango materiala sailkatzeko lanean. Larruzko era guztietako produktuak ikusi ditugu hantxe, Josu Tellabide etnologoarekin berba egitera joan garenean.

Ze material topatu duzue Telleria etxean?

Denetik; uhalgintza tailer bat zegoen hementxe, eta material mordoa zegoen: gerrikoak, era guztietako poltsak, uhalak, diruzorroak... Aipatzekoa da militarrendako material mordoa ekoizten zutela; esaterako, obusak eramateko motxilak, kartutxoak edo armak eramateko zorroak... Bestalde, langileen nominak, diru kontuak, katalogoak eta bulegoko bestelako materiala ere bai. Baita, josteko makinak edota zuloak egiteko beste makina bat ere, besteak beste.

Helburua da material hori berreskuratzea. Dena dago berreskuratze moduan?


Bai, ez dugu egoera txarrean aurkitu materiala, batez ere, kontuan hartuta 40 bat urtean itxita egon dela tailerra eta ordutik hementxe egon dela material hau guztia. Usoak bizi izan dira Telleria etxeko azkeneko solairu honetan urtetan eta dena oso zikina zegoen, baina, materiala garbituta, ondo geratuko da.

Zuen lana izan da material guztia sailkatzea, ezta?

Bai; aurreko astetik dihardugu Asier nire lankideak eta biok, material guztia sailkatzen. Dagoeneko ia dena sailkatuta daukagu; orain, geratzen zaiguna da inbentario zehatza egitea. Gero, beste batzuk arduratuko dira dena behar bezala garbitu, txukundu eta gordetzeaz.

Tailer hau Gipuzkoan gordetzen den bakarra da, ezta?

Bai; horregatik, oso interesgarria da Udalak duen asmoa,



A.I.

“Militarrendako material ugari ekoizten zuten hemen; obusendako motxilak, esaterako”

interpretazio gune bat edo museotxo bat egitearena, alegia.

Zaharkinak proiektuan ere jardun zenuen. Dagoeneko nahiko ondo ezagutuko duzue herria.

Bai, bai; Antzuola oso herri erakargarria da, asko maite dut.

“Larruzko gauzez gain, nominak, katalogoak eta josteko makinak ere topatu ditugu”

Diputazioarendako eta Eusko Jaurlaritzarendako ere lan egin izan dut, eraikinak katalogatzen, eta asko ibili izan naiz inguru honetan; gainera, esan behar da hemen inguruan, Bergarak eta Antzuolak dituztela baserririk ederrenak.

LABUR

Finalista Eguna ospatuko dute etzi, domeka, Trekutzen

Etzi, domeka, ospatuko du Arrola Mendizale Elkarteak Finalista Eguna. Trekutzen izango da hori: 09:30ean Herriko Plazan egin dute hitzordua eta handik Trekutzera joango dira, oinez. Trekutzen, salda eta txorizoa banatuko dute.

Gaztegunea bihar, zapatua, zabalduko dute berriro

Gaztegunea, gaztetxoendako Errekaldeko lokala, bihar, zapatua, zabalduko dute. Zapatu eta domeketan egongo da zabalik: zapatutan, 16:00etatik 20:00etara eta 21:00etatik 23:00etara; domeketan, berriz, 16:00etatik 21:00etara.

Bi pilotari berri ditu Olalde elkarteak

Bi pilotari berri hasi dira Olalden, oñatiarrak biak: Joseba eta Andoni Azkarate. Andonik gazte mailan jokatu du, Mendizabal, Longares eta Iturberekin batera. Andonik, berriz, nagusien mailan, Iban Unanue, Josu Agirre eta Xabier Biterirekin. Oraingo asteburuan hasiko dute denboraldia, Gipuzkoako Kluben Arteko Txapelketarekin.

Aiherran kanpaldia egingo du Arrolak 24an eta 25ean

Aiherrakoekin harremana sendotzeko, kanpaldia Aiherran antolatu du Arrolak. Hilaren 24an eta 25ean izango da hori. Mendi irteerak egingo dituzte hantxe; domekan, baita herri bazkaria eta musika emanaldia ere. Irteeraren prezioa 25 euro da; ize- na emateko aukera duzue, gaur, egubakoitza, 19:00etan, Arrolaren lokalean.

LEKY-BERRI MERENDEROA

Janariak eta edariak

Tf. 943 76 60 94 ANTZUOLA

EGAÑA

Era guztietako arotz lanak

Tarima eta parketa jartzea Zoruen kutxilatu eta barnizatuak

Kalegoi 21, ANTZUOLA Tel.: 943 76 64 23



Jose Gomez Abad

Errekalde 6, 4-B. Antzuola 943 76 60 19 943 76 60 43 Faxe: 943 76 60 19

INDUSTRI MANTENIMENDUA